

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat (UKA 2012/78)**

**Uunga siunnersuut: Qamutit motoorillit akileraarutaat pillugit Inatsisartut inatsisaata allanngortinneqarnera pillugu Inatsisartut inatsisaat (UKA 2012/79)**

**Uunga siunnersuut: Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaat (UKA 2012/81)**

*(Aningaasaqarnermut Naalakkersuisumit saqqummiunneqartut)*

**pillugit**

**Aningaasaqarnermut Akileraartarnermullu Ataatsimiititaliap**

**ISUMALIUTISSIISUTAA**

**Aappassaaneerinermut saqqummiunneqartoq**

Ataatsimiititaliaq suliarinninnermini ukuninnga inuttaqarpoq:

Andreas Uldum, Demokraatit, siulittaasoq

Olga P. Berthelsen, Inuit Ataqatigiit, siulittaasup tullia

Naaja Nathanielsen, Inuit Ataqatigiit

Aqqaluaq B. Egede, Inuit Ataqatigiit

Per Berthelsen, Siumut

Finn Karlsen, Siumut

Siverth K. Heilmann, Atassut

Ataatsimiititaliap UKA 12-im 27. september 2012-im siullermeerinerup kingorna siunnersuutit misissorpai.

Aningaasarsianit akileraarutit 1 %-imik apparneqarnerannut siunnersuutit ataatsimoorlutik aningaasalersuutanissaat siunertaammat siunnersuutit UKA 2012/78-ip, UKA 2012/79-ip aamma UKA 2012/81-ip ataatsimoortillugit suliarineqarnissaat Naalakkersuisunit kissaatigineqarpoq.

### **Apeqqutit**

Siunnersuutit suliarineqarnerannut atugassatut apeqqutit arlallit akissuteqarfigeqqullugit ataatsimiititaliap Aningaasaqarnermut Naalakkersuisoq qinnuigaa. Ataatsimiititaliap apeqquaasa aammalu Aningaasaqarnermut Naalakkersuisup akissutaata assilinerat isumaliutissiisummut matumunnga ilanngussaq 1-itut ilanngunneqarput.

### **Naalakkersuisumik apersuineq**

Siunnersuutinik suliarinninnermi ilaautut ataatsimiititaliap Aningaasaqarnermut Naalakkersuisoq apersorpaa. Apersuinissamut aggeqqussusissutip aammalu Aningaasaqarnermut Naalakkersuisup oqaassisaaasa allattorsimaffiata assilinerat isumaliutissiisummut matumunnga ilanngussaq 2-tut ilanngunneqarput.

### **Allakkatigut saaffiginnissut**

Akileraarutinik allannguineq pillugu Aningaasaqarnermut Naalakkersuisumik allakkatigut saaffiginnissummik ataatsimiititaliaq tigusaqarpoq. Saaffiginnissutip assilinera isumaliutissiisummut uunga ilanngussaq 3-tut ilanngunneqarpoq.

### **UKA 2012/78 - Unga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat**

#### **Siunnersuutip imarisaa siunertaalu**

Siunnersuutikkut siunertarineqarput; A) ernianut ilanngaammik killiliinissaq, B) utaqqiisaasumik inigisanik akileraarusiinissaq aamma C) ingerlaannartumik nalikilliliisinnaanermut sinneqartoorutinillu nalikilliliisinnaanermut periarfissanik killiliinissaq.

#### **A pillugu:**

Aningaasarsiat akileraaruteqaataasussat naatsorsorneqarneranni nammineq atugaasatut taarsigassarsiat erniaannut aningaasartuutit ilanngaatigineqarsinnaasut 90 procentimut killilerneqassasut siunnersuutigineqarpoq. Killiliineq atuutissanngilaq aningaasartuutit namminersorluni inuussutissarsiornermiq ingerlataqarnermut attuumassuteqarpata.

Ernianut ilanngaatip siunnersuutigineqartutut allanngortinneqarnissaata kingunerisassaasa paasinarsisisinneqarnissaat siunertaralugu siunnersummik suliarinninnerminut atatillugu ataatsimiitaliaq Naalakkersuisunut arlalinnik apeqquteqarpoq. Apeqputit akissutillu ilanngussaq 1-im aamma 2-mi takuneqarsinnaapput.

Paassisutissat pissarsiarineqartut tunngavigalugit ernianut ilanngaataasinnaasut ikilisinneqarnissaannik siunnersuut ataatsimiitaliami amerlanerussuteqartunit tunngaviusumik isigalugu tapaserneqarsinnaavoq.

#### B pillugu:

Utaqqiisaasumik inigisaq sioqquillugu ineqartitaaneq aamma utaqqiisaasumik ineqartitaaneq tamakkiisumik ilaannarkortumilluunniit akeqanngitsumik atugassiissutigineqarsimappat, taakku nalingisa aningaasarsiat akileraaruteqaataasussat naatsorsornerinut ilaangunneqartussaanerannik aalajangersakkamik paatsuugassaanngitsumik ilanngussisoqassasoq siunnersuutigineqarpoq.

Sulisitsisut pisussaaffigisussaassavaat utaqqiisaasumik ineqartitsinerup nalingata aningaasarsiatut B-tut nalunaarutiginissaa.

Utaqqiisaasumik inigisaq sioqquillugu ineqartitaaneq aamma utaqqiisaasumik ineqartitaaneq tamakkiisumik ilaannarkortumilluunniit akeqanngitsumik atugassiissutigineqarsimappat, taakku nalingisa aningaasarsiat akileraaruteqaataasussat naatsorsornerinut ilaangunneqartarnissaat ataatsimiitaliamit isumaqatigiittumit tunngaviusumik tapaserneqarpoq.

#### C pillugu:

Akileraarutitigut nalikilliliisarnermi maleruagassat ima allanngortinneqassasut siunnersuutigineqarpoq:

- Sinneqartoorutit ilanngaatigineqarsinnaanerannik atorunnaarsitsineq.
- Ingerlatseqatigiiffit ingerlaannartumik nalikilliliissutigisinnasaannut killigititap 15.000 kr.-inut appartinneqarnera.

- Ingerlatseqatigiiffit namminersorlutilu inuussutissarsiuteqartut nalikilliliisinna-nerisa naligiisinneqarnissaat, taamaattorli namminersorlutik inuussutissarsiuteqartut ingerlaannaq nalikilliliissutigisinnaasaat 50.000 kr.-inut angissuseqartillugu.

### Allannguutissatut siunnersuut

Naalakkersuisut aappassaaneerinissamut allannguutissatut siunnersuummik saqqummiussippu. Allannguutissatut siunnersuutip kingunerissavaa ingerlatseqatigiiffit 50.000 kr.-it angullugit nalilinnik ukiup ingerlanerani pigisanik pisismagunik, pisiamik nalingisa tamakkerlugit ingerlaannartumik nalikilliliissutigisinnaanerinut periarfissaqartinneqassasut. Ukiumili aningaasarsiorfiusumi 2012-imi killiussap taassuma 75.000 kr.-inut angissusilerneqarnissaa siunnersuutigineqarpoq.

Namminersorlutik inuussutissarsiuteqartut allannguutissatut siunnersuutip kingunerisaanik 100.000 kr.-it angullugit nalilinnik ukiup ingerlanerani pigisanik pisismagunik, pisiamik nalingisa tamakkerlugit ingerlaannartumik nalikilliliissutigisinnaanerinut periarfissaqartinneqassappu. Namminersorlutik inuussutissarsiuteqartut taamatut qaffasinnerusumik ingerlaannartumik nalikilliliissuteqarsinnaanerannik periarfissiinermut pissutaavoq ingerlatseqatigiiffit, ingerlatseqatigiiffit akileraarutissaat iluanaarutisiassallu akileraarutissaat pillugit maleruagassanik tunngaveqartumik sinneqartoortimik akileraaruteqaatiginissaasa kinguartinneqarnissaanut namminersorlutik inuussutissarsiuteqartunit periarfissarissaarnerunerat.

Allanngutissatut siunnersuutip kingunerissavaa nalikilliliisarnermi maleruagassat allanngortinneqarnerisa ataavartumik sunniutissaatut tagginneqartup ukiumut 1 mio. kr.-it missaannik apparnissaa 20 mio. kr.-it missaniilerluni.

Namminersorlutik inuussutissarsiuteqartut aningaasat ingerlaannartumik nalikilliliissutigisinnaasaasa siunnersuutaappaartumut sanilliullugu qaffanneqarnerannik aammalu ingerlatseqatigiiffit niunermik ingerlatsinerminnik maleruagassanut nutaanut naleqquaanissaminnut pitsausherumik periarfissinneqarnissaat siunertalarugu allannguutissatut siunnersuutigineqartut atuutsikkiartuaarneqarnissaannik kinguneqartumik allannguutissatut siunnersuut aappassaaneerinissamut saqqummiunneqartoq ataatsimiitaliami amerlanerussuteqartut Inuit Ataqatigiit Demokraatillu tapersersinnaavaat. Sivisunerusumik atortuulersitsiartuaarnikkut suliffeqarfiiit mikinerit aammalu namminersorlutik inuussutissarsiortut qajassuunneqarnerussappu, tamatumalu peqatigisaanik maleruagassat sakkukinnerusut sukateriffingineqassallutik. Matumani erseqqissarneqassaaq

nalikilliliisarnermut maleruagassat nalinginnaasut siunnersuutikkut allanngortinneqanngimmata.

Inussutissarsiortunut naapertuutinngitsumik artukkiisussaammat, tamannalu suliffissanik pilersitsiniarnermut kiisalu inuaqatigiinni aningaasaqarnerup nalinginnaasumik pitsanngorsarniarneranut akerliusq ilimagineqartariaqariaqarmat siunnersuut ataatsimiitaliami ikinnerussuteqartunit Siumumit Atassummillu taperserneqarsinnaanngilaq.

**UKA 2012/79 - Uunga siunnersuut: Qamutit motoorillit akileraarutaat pillugit Inatsisartut inatsisaata allanngortinneqarnera pillugu Inatsisartut inatsisaat**

**Siunnersuutip imarisaa siunertaalu**

Inatsisisatut siunnersuutip kinguneranik oqimaassuseq akunnattoq (901 kg.-miit 1.500 kg. angullugit) oqimaassutsinut marlunnut agguarneqassaaq, tassalu 2) qamutit motoorillit 901 kg.-miit 1.200 kg. angullugit oqimaassusillit aamma 3) qamutit motoorillit 1.201 kg.-miit 1.500 kg. angullugit oqimaassusillit.

Siunnersuutigineqarpoq qamutit motoorillit 901 kg.-miit 1.200 kg. angullugit oqimaassusillit akileraarutaat ukiumut 10.049 kr.-iussasoq, qamutillu motoorillit 1.201 kg.-miit 1.500 kg. angullugit oqimaassusillit akileraarutaat ukiumut 12.142 kr.-iussasoq. Oqimaassutsit sinnerisa akileraarutaat allanngortinnagit atuutiinnassasut siunnersuutigineqarpoq.

**Allannguutissatut siunnersuut**

Naalakkersuisut aappassaaneerinissamut allannguutissatut siunnersuummik saqqummiussippu. Allannguutissatut siunnersuutip kingunerissavaa biilinut minnerpaanut oqimaassutsimut killiliussaq 900 kg-niit 1.000 kg-nut qaffanneqassasoq, taamaasilluni biilit 901 kg-niit 1.000 kg-t angullugit oqimaassusillit qamutit motoorillit akileraarutaannik appasinnerpaamik siunissami akileraaruserneqartalissallutik.

Tamatuma peqatigisaanik siunnersuutigineqarpoq nutaamik oqimaassutsimik ivertitsinikkut 1.201 kg-t 1.500 kg-lu akornanni oqimaassusillinnut akileraarut ukiumut 10.747 kr.-inut angissusilerneqassasoq, siunnersuutigineqaqqartutut ukiumut 12.142 kr.-iunatik.

Taarsiullugu siunnersuutigineqarpoq 1.500 kg-t sinnerlugit oqimaassusilinnut akileraarutit ullumikkut atuuttunut naleqqiullugit qaffanneqassasut, taamaalilluni isertitaqarnerulissutissat siunnersuutigineqaqqaartutut ukiumut 3 mio. kr.-inik amerlassuseqassallutik.

Allannguutissatut siunnersuutikkut biilit oqimaannerpaat avatangiisinullu innarliinerpaat qaffasinnerusumik akileraarusigaanerat, tamatumalu peqatigisaanik siunnersuutaqqaartumut sanilliullugu biilit mikisut akilerarutinik qaffaanermut ilaatinneqannginnissaat akunnattumillu angissusillit annikinnerusumik akileraarusigaanerat ataatsimiititaliamit pitsasutut isigineqarpoq. Taxat biilillu inuussutissarsiornermut atatillugu atorneqartut amerlanerpaat siunnersuutaqqaartumut sanilliullugu annikinnerusumik akileraaruserneqarnerat allannguutissatut siunnersuutip kingunerissagaa ataatsimiititaliamit naatsorsuutigineqarpoq.

Taamaattumillu Naalakkersuisut allannguutissatut siunnersuutitut saqqummiussaat ataatsimiititaliap isumaqtigiittup tunngaviusumik isigalugu tapersersinnaavaa.

#### **UKA 2012/81 - Uunga siunnersuut: Qalerallit avataasiorluni aalisarnermi pisarineqartut akitsuutaat pillugu Inatsisartut inatsisaat**

##### **Siunnersuutip imarisaa siunertaalu**

Suliffeqarfii, matumani aamma inuit, ingerlatseqatigiiffit, umiarsuaatileqatigiiffit ilaallu ilanngullugit avataasiorlutik qaleralinniarnissamut pisassinneqarsimasut, pisamik ilaasa Kalaallit Nunaanni tunitsivinnut tunisassiorfinnulluunniit tunineqartussaanngitsut akitsuutan-nik nunatta karsianut akiliisalernissaat siunnersuutigineqarpoq.

Akitsuummik akiliisussaataitaaneq atuutilissaaq suliffeqarfiiup inuulluunniit pisat Kalaallit Nu-naannit annippagit imaluunniit pisat inummut pingajuusumut tunippagit.

Akitsuutip aallaqqaammut kiilumut 2,50 kr.-iunissaa siunnersuutigineqarpoq. Akitsuutip angissusia kvartalit tamaasa ingerlaavartumik iluarsiivigineqartassaaq.

Qalerallit tulaanneqartartut, tamatumali kingorna suliareqqinneqaratik nunanut allanut ingerlateqqinneqartartut, akitsuusiinermut ilanngunneqarnissaannut periarfissat paasiniarlugit ataatsimiititaliaq siunnersuummik suliarinninnerminut atatillugu apeqquutinik arlalinnik Naalakkersuisunut saqqummiussivoq. Apeqquit akissutillu ilanngussaq 1-im i aamma 2-mi takuneqarsinnaapput. Naalakkersuisut akissutaat ataatsimiititaliamit tussaatissatut tiguneqarpoq.

Paassisutissat pissarsiarineqartut tunngavigalugit qalerallit akitsuuserneqarnissaannik siunnersuut saqqummiunneqartoq ataatsimiititaliamit isumaqatigiittumit tunngaviusumik isigalugu taperserneqarsinnaavoq.

### **Tusarniaanermit akisutit**

Siunnersuutit matumani pineqartut ataatsimiititaliamit suliarineqarnissaannut atugassatut tusarniaanermut akissutit assilineri ataatsimiititaliamit piniarneqarput. Ilusiliinissamut piumasaqaatit Inatsisartut Siulittaasoqarfiannit aalajangersarneqartut naapertorlugit tusarniaanermut akissutit inatsisisstatut siunnersuutinut Inatsisartunit suliarineqartussatut tunniunneqartunut ilanngullugit tunniunneqartussaammata ataatsimiititaliap Naalakkersuisunut eqqaasitsissutigissavaa.

Siunnersuutit piffissami 29. junimit 27. julimut 2012-imi ukununnga tusarniaassutigineqarsimasut ataatsimiititaliap paasivaa:

KANUKOKA, KNAPK, Kalaallit Nunaanni Sulisitsisut Peqatigiiffiat (GA), NUSUKA, SIK, Inuussutissarsiornermut Suliffeqarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ineqarnermut Attaveqarnermullu Naalakkersuisoqarfik, Ilinniartitaanermut Ilisimatusarnermullu Naalakkersuisoqarfik aamma Nunamut Namminermut, Pinngortitamut Avatangiisinullu Naalakkersuisoqarfik.

Inatsisisstatut siunnersuutit nassuaatitaallku Nanoq.gl-imi tusarniaasarfikkut tamanut aamma saqqummiunneqarsimapput.

Tusarniaanerup ingerlanneqarsimaneranut ataatsimiititaliaq annertunerusumik oqaaseqaatissaqanngilaq.

### **Siunnersuutip aningaasatigut kingunissai**

Siunnersuutit saqqummiunneqartut (taakkununnga ilanngullugit allannguutissatut siunnersuutit) aningaasatigut kingunissaat inatsisisstatut siunnersuutinut ataasiakkaanut nassuaatini nassuiarneqarput, taakkulu innersuussutigineqarput. Aningaasatigut kingunissat pillugit ataatsimiititaliaq oqaaseqaatissaqanngilaq.

### **Ataatsimiititaliap oqaaseqaatai allat**

Aningaasarsianit akileraarutit appaatissaattut nalunaarutigineqartup matussuserneqarnissaanut aningaasalersuutissatut periarfissat allat paasinarsiseqqullugit siunnersuummik

suliarinninnerminut atatillugu ataatsimiititaliap Naalakkersuisut qinnuigai. Ilaatigut entreprenørit maskiinaasa oqimaatsut akitsuuserneqarsinnaanerat aammalu akeqanngitsumik iluaqtissiissutit arlallit akileraarusigaanerisa iluarsiissuteqarfingeqarsinnaanerat Naalakkersuisunit nalilerneqassasut ataatsimiititaliamit qinnutigineqarpoq. Ataatsimiititaliap apeqputai Naalakkersuisullu akissutaat ilanngussaq 1-im i takuneqarsinnaapput. Naalakkersuisut akissutaat ataatsimiititaliamit tusaatissatut tiguneqarpoq.

### **Ataatsimiititaliap inassuteqaatai**

#### **Ataatsimiititaliami amerlanerussuteqartut Inuit Ataqatigiit aamma Demokraatit siunnersuutit pillugit ima oqaaseqaateqarumapput:**

Siunnersuutit pingasut matumani pineqartut aqqutigalugit siunertaavoq aningaasarsianit akileraarutinik appaanerup aningaasalorsorneqarnisaa, taamaalillunilu pineqartoq tassaanngilaq akileraarutissanik ataatsimoortumik qaffaaneq. Ungasinnerusoq isigalugu akileraarusersueriaatsitsinnik allannguinermik aammalu isertitanik sulinikkut pissarsiarineqanngitsunik annertunerusumik akileraarusersuilernissamik kinguneqartumik ineqarnikkut, isumaginninnikkut, pensionisiaqarnikkut akileraartarnikkullu annertunerusumik iluarsaaqqinnissami akileraarusersueriaatsitsinnik akitsuusersueriaatsitsinnillu allannguineq una alloriarnertut siullertut Inuit Ataqatigiinnit Demokraatinillu isigineqarpoq. 72 mio. kr.-it missaanniittut akileraarutinik appaanermut atorneqartussat allamut atorneqannginnissaat assut pingaaruteqarpoq, taamaanngippammi akileraarutinik appaaneq innuttaasunut eqquissammatt. Siunnersuutit maannatut iluseqartillugit akileraarutinik allannguinermi amerlanerpaat annikitsunnguamik iluanaarutissinneqassapput, aatsaalli akileraarutinik appaaneq piviusunngortinneqarpat. Allannguutissatut siunnersuutit Naalakkersuisunit saqqummiunneqartut ataatsimiititaliami amerlanerussuteqartunit iluarisimaarneqarput, tamatumani nalikilliliisarnermut tunngasoq sivisunerusumik atuutsikkiartuaarneqassalluni, taamaalilluni eqqugaasut tamatumunnga naleqqussarsinnaaqqullugit aammalu qamutinut motorilinnut akileraarummut tunngatillugu biilit mikinerusut akileraarutip qaffanneqarneranit eqqugaassanatik.

#### **Tamanna tunngavigalugu ataatsimiititaliami amerlanerussuteqartut siuliani taaneqartut allannguutissatut Naalakkersuisut siunnersuutigisaat ilanngullugit siunnersuutit akuerineqassasut inassutigaat.**

#### **Ataatsimiititaliami ikinnerussuteqartut Siumumeersut Atassummeersullu siunnersuutit pillugit ima oqaaseqaateqarumapput:**

Akileraarutissatut akitsuutissatullu ataatsimoortutut saqqummiunneqaratik inatsisisssatut siunnersuutitut immikkoortutut saqqummiunneqarsimagaluarpata isumaliutissiissummi matuman i takuneqarsinnaasutut siunnersuutit saqqummiunneqartut arlallit Siumumit Atassummillu tunngaviusumik tapserneqarsinnaagaluarput; taakkununnga ilaallutik qalerallit suliarineqanngitsut akitsuutaat aamma utaqqiisaasumik inigisanik akileraarusiineq. Kiisalu qamutit motorillit akileraarutaannik allannguinermut taarsiullugu entreprenørerit maskiinaasa oqimaatsut akileraaruserneqarnissaasa Naalakkersuisunit sulissutigineqarnissaat Siumumit Atassummillu kissaatigineqarneruvoq.

Siunnersuutilli aningaasarsianit akileraarutip 1 %-imik apparneqarnissaanik Naalakkersuisut siunnersuutaannut ataqtigiissillugit isigineqassapput, taamatut iliornikkut innuttaasut aningaasaqarnikkut qaffaaffigineqarnissamik pisariaqartitsinerpaasut iluaquserneqarnaviangimmata. Nunatta aningaasaqarnikkut maanna inissisimanerata aammalu ukiuni aggersuni inissisimanissaata kingunerisaanik aningaasarsianit akileraarutip 1 %-imik apparneqarnissa Siumumit Atassummillu tapserneqarsinnaanngilaq. Siunnersuutikkut saqqummiunneqartukkut isertitarineqartut suliffissaqartitsinerup siuarsarnissaanut immikkut ittumik suliniutinut, taakkununngalu ilanngullugu nioqquutissat nunatsinni tunisassiarineqartut assartorneqarneranni akit apparneqarnissaannut atorneqarnissaat Siumumit Atassummillu kissaatiginartinneqarneruvoq. Aningaasarsianit akileraarutit apparneqarnissaannut taarsiullugu isertitanit ilanngaatip minnerpaaffissaata nalinginnaasumik qaffanneqarnissa Siumumit Atassummillu kissaatiginartinneqarneruvoq, tamannami isertitakinnerpaanut annertunerusumik sunniuteqassammat. Taamaattumillu siunnersuutit matuman i pineqartut akuersaarlugit Siumut Atassullu taasisinnaanngillat.

**Tamanna tunngavigalugu ataatsimiitaliami ikinnerussuteqartut siuliani taaneqartut siunnersuutaaqqaartut aammalu allannguutissatut Naalakkersuisut siunnersuutigisaat itigartinneqassasut inassutigaat.**


23. oktober 2012

UKA 2012/78  
UKA 2012/79  
UKA 2012/81

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuuit appaassaaniigassanngortippai.



Andreas Uldum, Siulittaasoq




Olga P. Berthelsen




Naaja Nathanielsen



Aqqaluaq B. Egede



Per Berthelsen



Finn Karlsen



Siverth K. Heilmann